



Broj: 02/1-50-1-22-34/09  
Dana, 25.3.2009.godine

## **Z A P I S N I K**

sa 34. sjednice Ustavnopravne komisije Doma naroda Parlamentarne skupštine BiH održane 25.3.2009. godine.

Sjednica je održana 25.3.2009. godine sa početkom u 11 sati.

Sjednici su prisustvovali članovi Komisije:

1. Ivo Miro Jović,
2. Slobodan Šaraba,
3. dr Hilmo Neimarlija,
4. Sulejman Tihić
5. Zoran Koprivica,
6. Rudo Vidović.

Sjednici je prisustvovao i sekretar Komisije, dr. Zijad Hasić.

Od gostiju, sjednici Komisije prisustvovali su: Zoran Brkić, viši stručni saradnik u PSBiH; Aleksandra Kuratko, voditeljica parlamentarnog programa OSCE-a; Melissa Shoemaker i Žiga Mirsad, politički službenici Ambasade SAD-a; Amra Zorlak iz Odjela za ljudska prava iz OSCE-a.

Na početku sjednice, vođena je rasprava o tačkama dnevnog reda, tako da je skinuta s dnevnog reda tačka: Prijedlog zakona o dopuni Zakona o službenom glasilu Bosne i Hercegovine; predlagača Predstavničkog doma Parlamentarne skupštine BiH.

Na prijedlog predsjedavajućeg Komisije, **Ive Mire Jovića**, članovi Komisije su usvojili slijedeći

## **D N E V N I R E D**

1. Verificiranje Zapisnika 33. sjednice Komisije;
2. Realiziranje ranije donesenih zaključaka;
3. Prijedlog Amandmana I na Ustav Bosne i Hercegovine, predlagač Vijeće ministara BiH; (postupak u nadležnoj komisiji u skladu s čl. 128. i 129. Poslovnika Doma naroda)
4. Posjeta Bundesratu u SR Njemačkoj;
5. Ostala pitanja

### **Ad. 1. Verificiranje Zapisnika 33. sjednice Komisije**

**Ivo Miro Jović**, predsjedavajući Komisije, predložio je diskusiju o ovoj tački Dnevnog reda.

Nije bilo diskusije o Zapisniku s 33. sjednice.

Nakon toga, Komisija je jednoglasno usvojila zapisnik 33. sjednice.

### **Ad. 2. Realiziranje ranije donesenih zaključaka**

U uvodu za ovu tačku dnevnog reda, **Ivo Miro Jović**, predsjedavajući Komisije, predložio je da sekretar Komisije, po običaju, prezentira stanje zaključaka i njihove realizacije.

Sekretar Komisije, **dr Zijad Hasić** je upoznao članove Komisije o stanju zaključaka. Govorio je o svim zaključcima. Također, upoznao je članove o pristigлом izvještaju Pravobraniteljstva BiH koje je zatraženo na 33. Sjednici, a odnosi se na informiranje o stanju imovine Bosne i Hercegovine koja se nalazi u inozemstvu i poduzetim mjerama njene zaštite.

**Nakon toga**, članovi Ustavnopravne komisije Doma naroda Parlamentarne skupštine Bosne i Hercegovine primili su k znanju prezentaciju zaključaka.

### **Ad. 3. Prijedlog Amandmana I na Ustav Bosne i Hercegovine, predlagač: Vijeće ministara BiH;**

U uvodu za ovu tačku dnevnog reda, **Ivo Miro Jović** je ukazao na slijedeće:

Predlagač Vijeće ministara Bosne i Hercegovine dostavio je 16.2.2009. godine, Domu naroda Parlamentarne skupštine BiH Prijedlog Amandmana I na Ustav Bosne i Hercegovine, radi razmatranja i usvajanja.

Ukazao je na održane Javne rasprave o Prijedlogu Amandmana I na Ustav Bosne i Hercegovine zajedno sa Ustavnompravnom komisijom Predstavničkog doma, 11.3.2009. godine u Brčko Distriktu, 12.3.2009. godine u Tuzli, 12.3.2009. godine u Mostaru, 12.3.2009. godine u Bana Luci, 17.3.2009. godine u Sarajevu, te se zahvalio članovima što su prisustvovali ovim javnim raspravama. Potom je istaknuo važnost usvajanja amandmana za Brčko Distrikt. Konstatirao je, da su članovi Komisije Hilmo Neimarlija i Slobodan Šaraba uložili amandmane na Amandman I Ustava BiH.

Predložio je raspravu o Amandmanu I na Ustav Bosne i Hercegovine i predloženim amandmanima na ovaj amandman.

**Sulejman Tihiić** je istakao da je amandman dobio veliku podršku šire javnosti, a naročito u Brčko Distriktu, čiji položaj i pravni status ovaj amandman regulira. On je bio na javnim raspravama, osim u Brčkom i u Tuzli, te su u tim gradovima, prisutni podržali donošenje Amandmana. Istakao je važnost njegovog usvajanja i predložio članovima da podrže njegovo usvajanje.

**Slobodan Šaraba** je ukazao na iskustva svog angažiranja na javnim raspravama u Mostaru i Sarajevu. On žali što javna rasprava nije bila organizirana i na drugim mjestima u Bosni i Hercegovini (Bihać, Trebinje i sl.) jer bi ljudi neposrednije, vidjeli i čuli predmet i učesnike javne rasprave. Najavio je da će, u slučaju neusvajanja njegovog amandmana u Komisiji, uložiti ga i braniti na Domu.

**Zoran Koprivica** smatra da usvajanjem ovog amandmana pravi se veliki iskorak i dograđuje ustavnopravni sistem Bosne i Hercegovine. Nekoliko je razloga iz kojih proizilazi potreba usvajanja amandmana, a neki od njih su: rješavanje pitanja PDV-a, ostvarivanje zaštite pred Ustavnim sudom BiH, i mnogi drugi.

**Rudo Vidović** je zadovoljan dimenzijama rezultata održanih javnih rasprava. Tekst Amandmana I na Ustav BiH je prihvatljiv, ali bilo koje drugo njegovo prekrjanje ne bi bilo dobro.

**Hilmo Neimarlija** je ukazao na propust u tekstu Amandmana I na Ustav BiH, koji se odnosi na pitanje objavljivanja teksta amandmana u službenim glasilima. Stoga je predložio sljedeći amandman:

#### **Amandman I**

*U tekstu Prijedloga amandmana I na Ustav Bosne i Hercegovine, nakon rečenice “Dosadašnji član VI.4. postaje član VI.5.” dodaje se nova rečenica koja glasi:*

*“Amandman I na Ustav Bosne i Hercegovine stupa na snagu osmog dana od dana objavljivanja u “Službenom glasniku Bosne i Hercegovine”.*

**Slobodan Šaraba** je istakao da je prisustvovao javnim raspravama o Prijedlogu Amandmana I na Ustav Bosne i Hercegovine koje su održane u Mostaru i Sarajevu i smatra da je amandman proizveo veliko interesiranje građana Bosne i Hercegovine. Stoga smatra da je bilo neophodno održati rasprave u još nekoliko gradova BiH.

Potom je predložio usvajanje amandmana na Amandman I na Ustav Bosne i Hercegovine koji glasi:

#### **Amandman I**

*U stavu (1) predloženog amandmana, usred riječi “entiteta” dodaje se riječ “dva”.*

*Ustavu (2) predloženog amandmana, briše se riječ “više” i umjesto nje se dodaje riječ “oba”.*

**Sulejman Tihiić** je istakao da se pitanje organizacije države Bosne i Hercegovine, onako kako je Ustavom postavljeno, ne može rješavati kroz ovaj amandman, te da bi se predloženim izmjenama koje zadiru u sadržaj teksta amandmana samo stvorile nedoumice i komplikacije. Predložio je članovima da usvoje tekst Amandmana I na Ustav BiH u predloženom obliku, te da se kao njegov sastavni dio usvoji i amandman Hilme Neimarlije.

**Zoran Koprivica** je istakao da se u dijelu teksta amandmana u kojem stoje riječi „dva ili više entiteta“ odnosi i tumači samo u kontekstu pristupa Ustavnom sudu, a ne u postojanju više entiteta.

**Ivo Miro Jović** je istakao da su sve političke stranke, gradonačelnik Brčko Distrikta, supervizor za Brčko Distrikt i drugi dali podršku za usvajanje ovog amandmana, te da je bio potreban niz godina da građani Brčko Distrikta postanu punopravni građani Bosne i Hercegovine. Stoga je predložio članovima da, uzimajući u obzir takvu situaciju u kakvoj se nalazio Brčko Distrikt, usvoje predloženi amandman.

- Nakon provedene rasprave Ustavnompravna komisija Doma naroda Parlamentarne skupštine Bosne i Hercegovine s četiri glasa „za“, jednim glasom „protiv“ i jednim glasom „suzdržan“ nije usvojila amandman Slobodana Šarabe.
- Potom je Ustavnompravna komisija Doma naroda Parlamentarne skupštine Bosne i Hercegovine, nakon glasanja, jednoglasno usvojila amandman Hilme Neimarlije.
- Komisija je, zatim, s pet glasova „za“ i jednim glasom „protiv“ usvojila tekst Amandmana I na Ustav Bosne i Hercegovine s uložnim amandmanom..

#### **Ad. 4. Posjeta Bundesratu u SR Njemačkoj;**

Sekretar Komisije, **dr Zijad Hasić**, podsjetio je članove Komisije na posjetu Komisije Bundesratu, koja je predviđena za period 1.4.2009. - 4.4.2009. godine i ukratko upoznao sa planom posjete i institucijama koje će biti posjećene u periodu posjete Bundesratu u SR Njemačkoj.

**Ad.5. Ostala pitanja;**

U vezi ostalih pitanja, sekretar Komisije, **dr Zijad Hasić**, upoznao je članove Komisije sa najavljenom posjetom Bundestaga i Bundesrata Ustavnoj komisiji, za period 9.4.2009. godine. Članovi Komisije su potom prihvatili termin posjete 9.4.2009. godine od 10-11 sati.

SEKRETAR USTAVNOPRAVNE  
KOMISIJE

dr. Zijad Hasić

PREDSJEDAVAJUĆI  
USTAVNOPRAVNE KOMISIJE

Ivo Miro Jović